

[ FOTO AMIRUDIN SAHIB / BH ]

# Koperasi mampu kukuh ekonomi pesawah padi

→ Permudah pasar hasil, atasi monopoli pengeluaran

Oleh Nurhayati Abillah  
nurhayatiabillah@bh.com.my

Jurang penguasaan pasaran yang luas antara petani dengan peserta industri seperti pengilang dan pemborong sehingga menyebabkan pesawah terpaksa akur dengan keputusan yang ditetapkan pengilang atau pembeli.

Susulan itu, penubuhan koperasi dan melaksanakan pemasaran beras secara terbuka akan membantu mengukuhkan kedudukan ekonomi pesawah di Malaysia, sekali gus mengurangkan masalah monopoli pengeluaran padi, demikian menurut Institut Penyelidikan Khazanah (KRI).

Felo Pelawat Kanan KRI, Datin Paduka Dr Fatimah Mohamed, berkata jalan terbaik untuk mengatasi masalah ini dan memperbaiki nasib petani ialah memperkasakan institusi di ladang atau sawah serta menggalakkan mereka menubuhkan koperasi sesama sendiri.

“Langkah ini membolehkan mereka mengumpul dana dan modal

untuk membeli mesin (kelengkapan), mendapatkan input serta menguruskan pemasaran mereka sendiri,” katanya ketika ditemui pada pelancaran Laporan ‘Status Industri Padi dan Beras di Malaysia’ dan perbincangan mengenai isu ‘Situasi Makanan di Malaysia’, di Kuala Lumpur, semalam.

Fatimah menambah, pesawah perlu diberi peluang untuk menceburi kegiatan nilai tambah seperti memproses beras kerana ia akan membantu mereka meningkatkan hasil serta menjana sumber pendapatan tambahan.

“Kita selalu menyangkakan kewujudan kilang besar itu satu pilihan yang baik, sebenarnya tidak. Jika kita lihat di Jepun atau Belanda, kilang pengeluaran padi terdiri daripada kilang kecil dimiliki oleh petani sendiri.

## Bantu petani lain

“Mereka memproses sendiri tanaman padi yang dikeluarkan dan apabila sudah berjaya mereka akan berusaha untuk membantu petani lain. Contohnya di Korea, petani di negara itu berupaya mengadakan pasar raya sendiri,” katanya.

Beliau berkata, Malaysia sekitar 70-an memiliki 971 kilang padi dan paling membanggakan 60 peratus daripadanya dimiliki koperasi petani.

“Bagaimanapun, sejak Lembaga Padi dan Beras Negara (LPN) ditubuhkan pada 1971, kemudian-



**Nungsari (empat dari kiri) pada pelancaran Laporan ‘Status Industri Padi dan Beras di Malaysia’ dan perbincangan mengenai isu ‘Situasi Makanan di Malaysia’, di Kuala Lumpur, semalam.**

nya diswastakan sebagai PadiBeras Nasional Bhd (BERNAS) pada 1996, jumlah itu berkurangan kepada kira-kira 200 pengilang,” katanya.

Selain itu katanya, pemasaran input perlu dibuka dan diliberalisasikan tanpa hanya menumpukan kepada satu agensi.

“Contohnya dari aspek pengagihan subsidi baja. Apabila agihan itu dibuka, maka ia akan mewujudkan industri input tempatan yang dinamik dan memberikan lebih banyak pilihan kepada pesawah,” katanya.

Mengulas lanjut, beliau berkata, pengurangan subsidi baja akan menjadikan pesawah lebih kreatif dan mendapatkan pilihan terbaik untuk pengeluaran sawah mereka, seterusnya merangsang pesawah mencuba inovasi baharu.

“Saya tidak mencadangkan ia (pemberian subsidi) dikurangkan sehingga 100 peratus, tetapi jika dalam 30 peratus pun sudah dianggap baik,” katanya.



Jika kita lihat di Jepun atau Belanda, kilang pengeluaran padi terdiri daripada kilang kecil dimiliki oleh petani sendiri”

**Fatimah Mohamed,**  
Felo Pelawat Kanan KRI

## Masih berdepan masalah kemiskinan

Pengurangan pemberian subsidi seperti baja juga akan membantu pesawah menjadi lebih kreatif, berdaya saing dan mempelbagaikan inovasi dalam pengeluaran padi.

Fatimah berkata, pesawah di negara ini masih berdepan masalah kemiskinan walaupun pelbagai subsidi dan sokongan oleh kerajaan disediakan menerusi pihak yang berkaitan.

“Daripada pengumuman menteri baru-baru ini, 90 peratus pengeluaran padi telah dikeluarkan oleh pesawah yang terangkum di bawah B40. Maksudnya mereka masih dalam kemiskinan.

“Ini bermakna wujud masalah struktur yang serius dalam industri padi dan masalah ini dapat disimpulkan sebagai wujudnya dua pemisahan iaitu jurang kemiskinan antara pesawah dengan pemborong atau pengilang utama serta monopoli pasaran,” katanya.